

ON BIA DJËSSE ?

Di cès tins ci, dès mègrands vints, avou leû kèdje di sayas d' plouve, ont chofèler dissus lès têtes d' Florîde; Cuba, Haïti èt dès ôtès rèdjions do vichnauve. Nos î avans vèyu dès masses di sikètadjès; brîdjadjès èt minme (è rawète?) dès mwârts. Po ribati èt rarindjî tot, ça va coster tchèr èt vilin.

Po l' Florîde, l' Djôr Buxh a satchî èt doner, fou dès kèsses di s' n' État U.S., 30.000.000 di dolârs, c' èst d' pus ki po Niouw-York après l' 11 di sètîmbe.

Èsse po tot bén rimète à place? Nonna, ènn'don, kwè z-alèz crwêre là, c' èst djusse po fé del réclame po fé rivnu sins peû lès tourisses è... l' Florîde, ki s' Djèb di frèrè è nn' èst l' govîèrnèu!

C' èst bia, l' èsprit d' famille. C' èst là èto, k' è 2.000, k' il, li Djôr, avève polu mète à s' conte lès 537 vwès (d' pus?) po divnu Prèzidint...

BÉN RÂDE ON NOVIA PANSIONÉ.

A 51 ans, Twène Blêr, Prumî Minisse à London s' aprustêye à prinde si pansion (avant l' âdje). Po awè totès sès aujes, i vént di s' payî ène pitite maujone po, a pwinne, 5.000.000 d' Uros. I va insi î polu bouter sins pont d' rûje à on lîve di rimimbrances, k' on èst dèdjà prèsse à lî doner po ça sakants 1.000.000 d' lîves

stèrlindjes!... k' on s' bate po l' lîre?


C'KI ÈST D' BÉN

dins totès lès disbates po DHL l' Flande, Bièrsè, lès places po z-ovrer èt tos lès catiss, c' èst k' là-ddins i gn' a nèn l' pus pitite picîye d' ègoïsse. L' rifrin n' èst mauy l' donant-donant. Pont d' brût, pont d' caur. Pont d' « oyi »? « nièt » à tot! Au d' pus ça va, au d' pus k' c' èst lès édants ki font li lwè.



ON DWÈT TROP LON

Vola k' Trinète Alègrè nos fait rêche on lîve po nos fé sawè k' l' Îve Montand, s' bia-popa k' lès



mwâtès fouyes s' ramassenut à l' chipe dissus s' cavô lî a sititchî, sins lî fé pont d' mau, s' gros dwèt è s' mozète, k' èle n' avève ki kwat ans d' âdje (nèn dèdjà ostant k' on bon wiski!).

Grâce à ça, on l' va rivoye ôtrumint k' a vûdî on vère à Navarô èt k' ça l' va bén ricaûrler.

Èsse ki ça valève lès pwinnes di mète çoulà au djoû ossi lontins après?

Po l' mwins, dins l' « Vète roncine » da Marcèl Aymé, i gn' avève èto l' vîye k' on lî ôléve sès rumatisses, vèci...

FOÛ DI NOS RIDANTS

On vos va fé profiter d' ène vîjerîye k' on vént d' ritrover. Dins lès pâdjès ki vont shûre vos alèz lîre ène istwêre è imâdjès k' dins nosse djonne tins on avève èvoyî à Arthur Masson. Lès dèssins ont ène miète passé èt piède di leû fwâce mins l' fauve èst co bén là. On n' si sovènt pus dins ké lîve on l' avève rissatchî. Tot c' k' on saît co, c' èst k' l' ome di Lustin n' avève nèn stî contrêre èt nos ècoradjî... minme s' i n' vèyève nèn l' moyin d' bouter èshonne ©